


# die Junge vo de Alte Stainlemer



## Binggis Fasnacht 2019

Sujet:

# Aadie Goma

Der Achilles hett e Jung's bykoo.  
 Isch dä trans\*gender oder so?  
 Nai, doch der Zolli merggts jetz au:  
 Dä Gorilla-Maa isch e Gorilla-Frau.  
 Drum föön mer gscheiter noomool aa:  
 D Achilla hett e Buschi ghaa.  
 Doch d Affemuetter hett kai Schimmer,  
 was sii söll due im Kinderzimmer.  
 S wird aim ums Buschi angscht und bang.  
 Als Retter kunnt der Doggter Lang,  
 wo s Äffli vo der Mamme drennt,  
 zems zue sich z nää. Und s „Goma“ nennt.  
 Ganz stuuberain isch d Goma noonig.  
 Mit Windle zäpft sy drum dur d Woonig,  
 Sy griegt der Schobbe, sitzt am Disch.  
 E däwääg wird – was hesch, was gisch –  
 das glaine Äffli über Nacht  
 zem ene glaine Menschli gmacht.



*Apropos:*  
 Wenn Eltere jeede Furz vom Kind,  
 vor lutter Stolz scho völlig blind,  
 im Instafacesnap präsentiere,  
 ass mes mit Likes ka uusstaffiere,  
 merggt – wär ka dängge – zimmlig baff:  
 Die mache uus däm Mensch en Aff.

**Am Disch isch d Goma also gsässe,  
 zem mit em Löffel s Breili z ässe.  
 S Dringge griegt sy uus der Dasse  
 (Me ka das hütte fascht nüm fasse).  
 Jä, d Goma dörf bi Langs im Kaare  
 bis ins Tessin in d Ferie faare.  
 Si läbt, wies du grad sälber kennsch.  
 So macht me uus däm Aff e Mensch.**

*Apropos*  
 Wie d Lüt (die junge wie die alte)  
 im Feriehotel sich verhalte,  
 bim Büffet drängele und byge,  
 wie wenn sy am Verhungre syge,  
 wie jeeden ynestopft, was goot,  
 doch mee als d Helfti liige loot,  
 wie alli s Beschte wänn und raffe,  
 do mache d Mensche sich zue Affe.



**So noodinoo wird d Goma alt.  
 Drum muess sy zugg in Zolli, halt.  
 Dä Wäggsel isch für si seer bitter.  
 Sy füüt sich fremd im Affegitter.  
 Zue de Gorilla hebbt sy ganz  
 bis an iir Ändi e Distanz.  
 Denn d Goma isch – nit überdriibe –  
 als Affemensch sich sälber bliibe.**

*Apropos*  
 S gitt mängge Mensch – e jeedi Wett –  
 wo sich scho ganz verlore hett.  
 Will är gärn zue der Grubbe ghört,  
 verhaltet är sich völlig gstört,  
 ass du iin mänggmol fascht nüm kennsch.  
 So macht er sich zem Aff, dä Mensch.

**Aadie Goma, jetz bisch gange.  
 Mir sinn bewundernd an dir ghang.  
 Dy würdig Wäse hänn mir gschetzt.  
 Eso wär numme z hoffe jetz,  
 mir könnte, wenn mir s Läbe gstatte,  
 wie s du uns zaigt hesch, d Würde bhalte.**

D Ladäärnen-Uusstellig uff em Münschterplatz,  
 d Waagen- und Requisiten-Uusstellig uff em Kasäärneplatz  
 sinn vom Määntig znacht bis am Mittwoch demorge.

Drugg: Grempel AG



## Die Junge vo de Alte Stainlemer: Fasnacht mache und vyl mee!

Als Bueb kunnsch nadüürlig zue de **Alte Stainlemer**  
 Namme: .....  
 Voornamme: .....  
 Strooss: .....  
 PLZ / Ort: .....  
 Delifoon: ..... Joorgang: .....

Schigg die Aamäldig an Obmaa vo de Junge:  
 Marc Helfenstein, Aeussere Baselstrasse 304, 4125 Riehen  
 oder lütt em doch aifach aa: Delifoon 078 859 80 91  
 oder schigg en E-Mail an: m.helfenstein@stainlemer.ch

oder kumm in unsere Käller go schnuppere  
 am Samschtig 16. März oder am 23. März 2019  
 zwüsche zwai und vieri am Noomidaag  
 am Aubärg 2b (bi dr Heuwoog)  
 Cliquekällerbesichtigung und Apéro für alli Eltere  
 oder mäld dy under: [www.jungi-stainlemer.ch](http://www.jungi-stainlemer.ch)

# die Junge vo de Alte Stainlemer



## Jungi Garde Fasnacht 2019

Sujet:

### ERRARE HUMANUM EST

„Also lautet ein Beschluss:  
Dass der Mensch was lernen muss.  
Nicht allein das Abc  
Bringt den Menschen in die Höh,  
Nicht allein im Schreiben, Lesen  
Übt sich ein vernünftig Wesen;  
Nicht allein in Rechnungssachen  
Soll der Mensch sich Mühe machen;  
Sondern auch der Weisheit Lehren  
Muss man mit Vergnügen hören.“



Soo hedd vor Zyt e schlaue Maa,  
wo dichden und guet zaichne kaa,  
de Junge fescht ins Gwüsse greedet,  
ass unsri Menschhait nid verbleedet!  
No hüdde gilt für uns die Maanig,  
denn hesch vo Wüesseschaft kai Aanig,  
bisch du nur e hoole Kopf  
und hänggsch scho glyy am Armuetsdropf!

Drum haisst s flyssig Schuele bsueche,  
doo hilft kai Jommre und kai Flueche.  
Im Baselbiet, denn daas hedd Klass,  
macht s Leeren alle Schieler Spass,  
doch in dr Stadt, s isch laider soo,  
wird die Sach nid wichtig gnoo,  
lieber dien sii demonschtriere  
und au hefdig randaliere!  
Für d Bildig isch dr Rammel rierig,  
das zeigt sich au in dr Regierig,  
die schigge d Kinder gärn in d Stadt,  
nur s Zaale isch denn nüm so gladd.  
D Regierig in dr Stadt isch schlabb,  
löscht langsam alli Liechder ab.  
Sorgt sich lieber, dasch iir Ding,  
um e doofe Veloring.



E Landei aber, mit syym Gschbäänli,  
faart zur Schuel gail mit em Bäänli,  
Ka allewyl, dörfsch s nid vergässe,  
in dr Schuel au beschtens ässe!  
D Buure nämmlig – die sin stuur –  
leere Wüssen und Kultur,  
in dr Stadt – y find s nid richdig -  
sin d Leerer nur sich sälber wichtig!

D Basler Leererschafd in Eere,  
wie will sii iiri Kinder leere??  
Kaa sii scho so frieh am Morge  
für Waishait und für Bildig Sorge?  
Denn die wär wirgglig hüdd vo Nööte,  
suscht goot de Bebbi alles flöote,  
no machd nid numme d Muba schlabb,  
au d Industry goot soo bachab!

Drum Finger uuse, s blybt drbyy,  
au z Basel hedds e Mängs Genie.  
Mit gscheite Männer und mit Fraue  
wänn mir die Stadt in d Hööchi baue;  
nid nur mit Dürm und Autibaane,  
nai - Innovazioon kunnt aane,  
so wird die Stadt, mer finde s stargg  
e Fortschridds- und e Wüessenspargg!

Denn öbbis mien mer scho no saage,  
bi dr Fasnacht kasch nid klaage,  
doo sin mir z Basel und au z Rieche  
uf dr Wält die gailschde Sieche!  
E jeede Rammel muess begryffe,  
die Beschde sin mir au im Pfyffe,  
und grossi Keenig, ooni z schummlle,  
stelle d Basler au im Drummlle!???

D Ladäärnen-Uusstellig uff em Münschterplatz,  
d Waagen- und Requisiten-Uusstellig uff em Kasäärneplatz  
sinn vom Määntig znacht bis am Mittwoch demorge.

Drugg: Gremper AG



## Die Junge vo de Alte Stainlemer: Fasnacht mache und vyl mee!

Als Bueb kunnsch nadüürlig zue de **Alte Stainlemer**

Namme: .....

Voornamme: .....

Strooss: .....

PLZ / Ort: .....

Delifoon: ..... Joorgang: .....

Schigg die Aamäldig an Obmaa vo de Junge:  
Marc Helfenstein, Aeussere Baselstrasse 304, 4125 Riehen  
oder lütt em doch aifach aa: Delifoon 078 859 80 91  
oder schigg en E-Mail an: m.helfenstein@stainlemer.ch

oder kumm in unsere Käller go schnuppere  
am Samschtig 16. März oder am 23. März 2019  
zwüsche zwai und vieri am Noomidaag  
am Aubärg 2b (bi dr Heuwoog)  
Cliquেকällerberesichtigung und Apéro für alli Eltere  
oder mäld dy under: [www.jungi-stainlemer.ch](http://www.jungi-stainlemer.ch)